

M112: Die Hochzeit

0,1 nû mügent ir hoeren zellen
0,2 von einem hêren spelle .
0,3 umbe einen küninc rîchen .
0,4 umbe manic schoene zeichen .
0,5 dâ michel sin an stât .
0,6 gesach in got der ez begât .
0,7 swer diu zeichene wile begân .
0,8 der sol guoten list haben .
0,9 alsô der smit vile guot .
0,10 die wiere in daz golt tuot .
0,11 daz insigele er vûre leit .
0,12 als er ez gelernet hât
0,13 daz iz vile hêrlîchen stât .
0,14 unde niht zergât .
0,15 die vrouwen zieret daz golt .
0,16 von diu ist si im holt
0,17 diu ist nie sô hêre noch sô rîche .
0,18 si treit an barer lîche
0,19 die bouge joch daz vingerlîn .
0,20 wie mac iz ir lieber sîn .
0,21 siu spennet vûre ire brüste .
0,22 daz ist geworht mit listen .
0,23 ein güldîn gewiere .
0,24 daz ez ir den lîp ziere .
0,25 daz golt ir wole ane stât .
0,26 wan si schône dâ mit gât .
0,27 kumet ir danne unheil .
0,28 daz si des verliuset ein teil .
0,29 ob iz danne aber ist .
0,30 gefallen in den mist .
0,31 sô suochet si spâte unde vruo .
0,32 mit den si getrûwet dâr zuo .
0,33 sô si sîn danne niht ervert .
0,34 den mist si vûre die türe kêret .
0,35 dâr under daz golt .
0,36 dem si êr was holt .
0,37 si læt ez nôten varn
0,38 si ne mege ez niemer bewarn .

0,39 vore dem unreinen miste .
0,40 dâ mügent ir lernē liste .
0,41 swelicher sô welle .
0,42 von einem hêren spelle .
0,43 swer den wîstuom treit .
0,44 unde er in niemanne seit .
0,45 unde in nieman lêret .
0,46 swâ er hin kêret .
0,47 der bezeichnenet daz golt . daz begraben ist .
0,48 tiefe under den mist .
0,49 daz der mist übergât .
0,50 unde ez niht schînen lât .
0,51 der man bezeichnenet den mist .
0,52 wan er gote leit ist .
0,53 den man vûre daz hûs kêrt .
0,54 alsô wirdet er geschert .
0,55 von der himelischen porte .
0,56 mit dem gotesworte .
0,57 daz er ez hier verderbet hât .
0,58 hei wie hôhe ez in gestât .
0,59 swen got sô geêret .
0,60 daz er in den wîstuom gelêret .
0,61 der schol in den zeigen .
0,62 die sîn niuwîht eigen .
0,63 oder er nimet es über sich .
0,64 vile starken gerich .
0,65 an den buochen daz geschriben stât .
0,66 wie disiu werlt zergât .
0,67 die heimuote die wir hier hân .
0,68 die müezen wir verlân .
0,69 ez wirdet hier allez verwandelet .
0,70 wan diu heiligen goteswort .
0,71 diu müezen elliu ergân .
0,72 als si got ie kunt hât getân .
0,73 daz sî wîp oder man .
0,74 swer diu wole vernemen kan .
0,75 unde si gerne wile erfüllen .
0,76 mit werken joch mit willen .
0,77 zuo dem sint si wole gewendet .
0,78 dâ sint si niht geschendet .
0,79 oeden . broeden . lôsheit . bôsheit .
0,80 den ist daz goteswort .. leit .
0,81 daz muoz allez sament sîn
0,82 in der gotes âbulgîn .
0,83 tunkel ist diu goteskraft .
0,84 über alle heidenschaft .
0,85 daz si toufe habent verkoren .
0,86 des sint si alle verloren .

0,87 daz si niht geloubent an got .
0,88 daz er wart gemartiret .
0,89 des müezen si sîn .
0,90 iemer in der vinsterîn .
0,91 swer die toufe hât entvangen .
0,92 dem wære ez wole ergangen .
0,93 wolte er diu dinc begân .
0,94 diu dâ zuo schulen gestân .
0,95 der solte haben ein reht .
0,96 alsô wîlen habete ein guot kneht .
0,97 unde ein êrlich maget .
0,98 daz sol iu werden gesaget .
0,99 wir schulen die alten ê verberen .
0,100 unde schulen die niuwen bewaren .
0,101 diu maget und der guote kneht .
0,102 die wurben umbe daz reht .
0,103 er ist ein guot kneht .
0,104 der dâ minnet daz reht .
0,105 der ist niht guot kneht .
0,106 der dâ habet unreht .
0,107 swie vile man in gelêrt .
0,108 daz er sich niht bekêret .
0,109 der bezeichnenet den hunt . der dâ wüetet .
0,110 der sîn selbes niene hûetet .
0,111 der bîzet den man .
0,112 wan er anders niene kan
0,113 wan er mit der tobesühte winnet .
0,114 unz er den tût gewinnet .
0,115 alsô tuont alle die dâ varnt
0,116 die des rehtes niweht warent .
0,117 die vehtent âne güete .
0,118 mit übermuote .
0,119 begrîfet si alsô der tût .
0,120 ne werdent si niht gebezzeret .
0,121 die sterbent in der tobeheit .
0,122 des koment die sêle in arbeit .
0,123 daz sint die rehten hellezagen .
0,124 daz lât iu nieman widersagen .
0,125 er ist ein kneht .
0,126 der dâ minnet daz reht .
0,127 der ist wole berihtet .
0,128 swenne er sich ervihtet .
0,129 sô verre dort unde .
0,130 von dem tiefen apgrunde .
0,131 swenne er sich des erwert .
0,132 daz er dar niene vert .
0,133 der dar niht wirdet brâht .
0,134 der habet sich wole bedâht .

0,135 der ist wîgant .
0,136 wider sînen vîant .
0,137 der zæme uns ze lobenne .
0,138 ze einem rehten degene .
0,139 der mac vroelîchen varen .
0,140 in des hêrren Abrahames barm .
0,141 dâ wirdet im leben verlâzen .
0,142 des wirdet er niht bestôzen .
0,143 der ist mit guotem ruome .
0,144 komen ze sînem hêrtuome .
0,145 dâ vernemet rehte wie ez gât .
0,146 in den mæren meregarten stât .
0,147 daz in daz apgründe gât .
0,148 ein vile hôch gebirge .
0,149 daz ist ein michel sorge .
0,150 gar über allez ermezzen .
0,151 daz hât ein wirt besezzen
0,152 dâ ne mac nieman ûf komen wan
0,153 der den sic – hât genomen .
0,154 an dem alten vâlände .
0,155 dem unserem vîande .
0,156 dâ zôch sich bî alten zîten .
0,157 ein hêrre mit sînen liuten .
0,158 der hêrre . lebete rehte .
0,159 der habete vile – knehte .
0,160 er lêch in allen den rât .
0,161 des er vile guot state hât .
0,162 sumelich sîne hêreste knehte .
0,163 die wurben niht rehte .
0,164 die rieten an sîn êre .
0,165 des entgulten si vile sêre .
0,166 dô was under dem gebirge .
0,167 ein vile michel sorge .
0,168 ein tiefer karkære .
0,169 der stuont alle wîle lære .
0,170 des habeten entrische liute vergezzen .
0,171 der was mit wûrmen besezzen .
0,172 dâr under swief der hêrre .
0,173 sîne ungetriuwe knehte verre .
0,174 dâ ne habeten si niht ze dem lebene .
0,175 wan daz in die wûrme hêten ze gebenne .
0,176 daz gewûrme ungehiure .
0,177 daz quelete si mit viure .
0,178 von den êren si kômen .
0,179 diu viurînen bant si nâmen
0,180 daz meiste wunder dô geschach .
0,181 daz ie dechein man gesach
0,182 die die wûrme dâ queleten .

0,183 unde die die martere doleten .
0,184 daz si einen anderen – rieten .
0,185 daz si wider ire hêrren hulden getæten .
0,186 daz si ire hêrre verswief .
0,187 in daz apgründe tief .
0,188 starke rach er sînen zorn .
0,189 dâ habete er si alle verloren .
0,190 dô was er dô bî den zîten .
0,191 mit anderen liuten .
0,192 die er haben solte
0,193 er stifte al daz er wolte .
0,194 dô was dô ein vile tief tal .
0,195 eines lustsames alsô vol .
0,196 dô wart geboren under der diete .
0,197 ein maget guote .
0,198 ûzer einem edelen künne .
0,199 der was gare elliu wünne . der
0,200 was gare alliu êre .
0,201 die gewan nie maget mêre .
0,202 diu habete alle gûetîn .
0,203 die rehten diemûetîn .
0,204 ire varwe was ir alsô licht .
0,205 jâ ne wart nie sô êrlîches niht .
0,206 die vereischete dô der hêrre .
0,207 ûf dem gebirge vile verre .
0,208 dô kom im dô in sînen muot .
0,209 daz im diu maget wære guot .
0,210 dô wolte dô der guote kneht .
0,211 gehîwen umbe daz reht .
0,212 daz er einen erben verlieze .
0,213 den nieman sînes rîches bestieze .
0,214 der möhte sîn ein küninc âne sorgen .
0,215 über dei teler unde über die berge .
0,216 einen boten habete er algar .
0,217 ze stete sande er in dar .
0,218 er gerte ir ze wîbe .
0,219 ze sînem lîbe .
0,220 dô ir diu boteschaft wart gesaget .
0,221 dô gelobete ez diu maget .
0,222 ire vriunde guote .
0,223 gerieten ez sô drâte .
0,224 dô bevestenete si der guote kneht .
0,225 sô was gewonelich unde reht .
0,226 er gap ir sîn vingerlîn
0,227 daz was rehte gemahelîn .
0,228 eines tages wurden si enein
0,229 daz er si wolte holen heim .
0,230 ire vriunde guote .

0,231 die habeten si mit huote .
0,232 daz si iender niht tæte .
0,233 daz si an ire êren iht gemuote .
0,234 si mohten si vile lîhte bewarn .
0,235 si ne wolte doch niemer misseveren .
0,236 diu michele huote .
0,237 umbe die maget vile guote .
0,238 diu bezeichnenet daz mennische guot
0,239 daz hât michel nôt .
0,240 unz an sînen tôt .
0,241 daz ez sich selbe wole bewar .
0,242 daz im der vîant niender widervare .
0,243 daz er ez sînes guoten willen niene wende
0,244 unde ez an guoten werken niene schende .
0,245 einen boten habete er algar .
0,246 ze stete sande er in dar
0,247 mit sîner manunge .
0,248 vûre die brût junge .
0,249 daz si niht entwalte .
0,250 ob si dar wolte .
0,251 si vlîzete sich ire wæte .
0,252 die si ane hæte .
0,253 daz si zæme sînem liute .
0,254 vile wole zuo einer briute .
0,255 dô ir diu boteschaft wart gesaget .
0,256 dô vlîzete sich diu maget .
0,257 baz ire wæte .
0,258 danne si êr hæte .
0,259 dô der tac dô wart .
0,260 daz er solte varen an die vart .
0,261 nâch sîner schoenen briute .
0,262 dô gewan er vile liute .
0,263 rittere gemeite .
0,264 vile wole bereite .
0,265 michel hereschare .
0,266 er kom küninclîchen dare .
0,267 dô si dô vuoren an die vart .
0,268 unde der liut gesamenet wart .
0,269 dô nam er under der menigîn .
0,270 die allertiurest solden sîn .
0,271 diu hêresten liute .
0,272 unde sande si nâch der briute
0,273 unde entbôt dem wirte .
0,274 von der sînen verte .
0,275 ob si dar wolten .
0,276 daz si niht en twalten .
0,277 dô dem wirte diu boteschaft dô wart gesaget .
0,278 dô îlte er gerwen die maget .

0,279 er badete si mit vlîze .
0,280 in gewæte daz wîze .
0,281 mit borten behangen .
0,282 mit güldînen spangen .
0,283 die güldînen wiere .
0,284 vuorte die maget hêre .
0,285 sô diu maget dâr her vûre gienc .
0,286 unde si den hêrren entvienc .
0,287 si was geberht unde lieht
0,288 jâ ne wære nie sô hêrlîches niht .
0,289 dô stuont diu maget guote
0,290 vore allem dem liute .
0,291 âne alle missetæte
0,292 si zam wole ze einer briute .
0,293 die hant bôt er ir dare
0,294 er gereit ze vorderst an der
0,295 schare . mit sîner schoenen briute .
0,296 vore allem dem liute .
0,297 dâr si vuor in der vare
0,298 si lûhte über alle die schare .
0,299 als ein liechter tagedesterne .
0,300 dô leitten si si gerne .
0,301 dô riten mit der briute .
0,302 kindische liute .
0,303 ritte gemeite .
0,304 hêrlîche gereite .
0,305 hoi wie si dô sunge .
0,306 dô si sie heim brungen .
0,307 heime wâren liute .
0,308 die warteten der briute .
0,309 si entviengen si mit râte .
0,310 mit alleme guote .
0,311 die êr dâ heime wâren .
0,312 die wirtschaft si verbâren .
0,313 die nuzzen si mit den gesten .
0,314 mit aller slahte lûsten .
0,315 dô kômen mit der briute
0,316 hermüede liute .
0,317 die trunken des lîdes .
0,318 unde ergazten sich alles leides .
0,319 dar kom des liutes ein michel kraft .
0,320 dâ was diu bezziste wirtschaft .
0,321 die dâr ie dechein man .
0,322 ze sînen brûtlouften gewan .
0,323 wande si die nuzzen .
0,324 die ir êr niene enbizzen .
0,325 nû sol iu werden gesaget .
0,326 allerêrste von der maget .

0,327 von der briute .
0,328 unde von allem dem liute .
0,329 unde von dem wirte .
0,330 der si alle dar brâhte . in verte .
0,331 diu michel wirtschaft .
0,332 diu bezeichnenet die mæren goteskraft .
0,333 daz got allez daz bestellet
0,334 alsô im selben gevellet .
0,335 in dem himele und ûf der erde .
0,336 daz ez iemer wâr werde .
0,337 êr hât er es ime erdâht .
0,338 unde hât ez allez verbrâht .
0,339 daz der briutegome dar kom .
0,340 unde die brût zuo im nam
0,341 daz bezeichnenet allermeiste .
0,342 den heiligen geist .
0,343 der in daz mennische kumet .
0,344 dâr ez mit weinene ende genimet .
0,345 dâ mit wirdet ez gelebente in gote .
0,346 swenne er von im scheidet . sô lît ez tôt .
0,347 die michelen êre .
0,348 die bezeichnenent noch mêre .
0,349 diu hêrlîchen dinc .
0,350 diu treffent an daz wênige kint .
0,351 daz diu muoter dâ gebiret .
0,352 unde ez gote gemaheret wirdet .
0,353 sô bezeichnenet daz vingerlîn .
0,354 den westerhuot sîn .
0,355 den daz kint ûfe hât .
0,356 als ez ze jungeste erstât .
0,357 unde ouch diu gotes gemahelîn .
0,358 iemer êwic schulen sîn .
0,359 daz er den boten habete algare .
0,360 unde er in sô dicke sande dare .
0,361 mit sîner manunge .
0,362 vûre die brût junge .
0,363 daz bezeichnenet unser vûreboten .
0,364 zuo dem almehtigen gote .
0,365 daz ist der êwarte .
0,366 mit dem gotes worte .
0,367 in dem kôre
0,368 vore dem vrône altære .
0,369 dâ ist diu sîne zunge .
0,370 diu rehte manunge .
0,371 daz buoch daz dâ geschriben stât .
0,372 daz saget den rîchtuom unde den rât .
0,373 den der brûtegoum hæte .
0,374 als uns der bote seite .

0,375 die vriunde an dem râte .
0,376 daz sint die tougene guote .
0,377 wan si uns helfent bringen .
0,378 zuo den kristenlîchen dingen
0,379 daz si vuoren an die vart .
0,380 unde der liut gesamenet wart .
0,381 unde er die tiuresten liute
0,382 sande nâch der briute .
0,383 die bezeichnenent den tac
0,384 den uns sande der wole mac .
0,385 über arme unde rîche .
0,386 vile harte krefticlîchen .
0,387 dâ al geschefte zuo dinget .
0,388 daz disiu werlt bringet .
0,389 der beschînet übel unde guot .
0,390 daz tuot er allez âne nôt .
0,391 der tac ist gemeine .
0,392 der beschînet niemen eine .
0,393 dechein hêrre ist sô rîche .
0,394 er beschîne den armen alsô minniclîchen .
0,395 alsô tuot der rehte unde der guote .
0,396 der verwîzet niemanne sîne missetæte .
0,397 der bezzeret in swâ sô er mac .
0,398 der bezeichnenet den tac .
0,399 sît uns sô minnet der tac .
0,400 der uns wole gehelfen mac .
0,401 engegen dem schulen wir ûf stân .
0,402 ze gotes dieneste gân .
0,403 wir schulen daz niht lâzen .
0,404 wir ne bieten uns im ze vuozen .
0,405 dem hêrren der dâ wole mac .
0,406 der uns sande den tac .
0,407 ôsten uns zuo gât .
0,408 aller lust unde aller rât
0,409 ôsten schulen diu westerbarn .
0,410 in daz himelrîche varn .
0,411 unde anderiu diu kint .
0,412 diu gote dienente sint .
0,413 diu des morgenes koment .
0,414 unde grôzen lôn nement .
0,415 die habent sich gewarnet .
0,416 allen den arnôt .
0,417 swelich weter si begât .
0,418 sô ist geschaffen ire rât .
0,419 under dem liute .
0,420 die sich bekêrent an der zîte
0,421 westent koment die under nône
0,422 die sich bekêrent schône .

0,423 die helfent riuten
0,424 den êrren mietliuten .
0,425 mit werken joch mit worten
0,426 in dem vrône wîngarten .
0,427 die werbent rehte ire dinc .
0,428 den gît got den pfenninc .
0,429 junc oder alte .
0,430 unz er des lîbes walte .
0,431 sô gâhent si harte
0,432 zuo der himelischen porte .
0,433 die entvæhet dâ der rîche .
0,434 alle gelîche .
0,435 versûmet er daz eine tor .
0,436 sô ist er iemer dâ vore .
0,437 daz sint diu vier ende .
0,438 dei haben wir an der hende .
0,439 die himelischen porte .
0,440 die sint bewart harte .
0,441 der ende der sint viere .
0,442 daz gesteine ist alsô hêre .
0,443 der steine aller iegelich .
0,444 treit ein licht alsô êrlich .
0,445 wider den anderen besunder .
0,446 daz ist ein michel wunder .
0,447 sô ne liuhte nie sô schône .
0,448 der sunne noch der mâne .
0,449 noch der sternendenchein .
0,450 nie sô rehte en schein .
0,451 der neheines licht .
0,452 trifftet her zuo niht .
0,453 sô die steine liuhtent harte .
0,454 in der himelischen porte .
0,455 allez gemeine .
0,456 lebendez gesteine .
0,457 daz liuhten dâr inne .
0,458 dâ mit zimberet got der rîche .
0,459 al sîn himelrîche .
0,460 der esterîch ist gûldîn .
0,461 wie möhte er êrlicher sîn .
0,462 dâr inne sitzet der magen .
0,463 von dem wir ie hoeren sagen .
0,464 ôsteret bekêret .
0,465 der uns alle hât gelêrt .
0,466 von im schînet daz lieht .
0,467 jâ ne wart nie sô êrlîches niht .
0,468 diu wünne die er an im hât .
0,469 diu kraft diu von im gât .
0,470 mit waltender hende .

0,471 der genimet niemer ende .
0,472 an deme wirdet wole schîn .
0,473 daz er ein hêrre wile sîn .
0,474 der überal sî ûf habente .
0,475 daz ie wart lebende .
0,476 an sîner gehuhte
0,477 sint daz mer joch die lufte .
0,478 elliû apgründe
0,479 unde daz ist dâr undere .
0,480 er pfliget vinster und licht
0,481 âne in ist niht .
0,482 daz alle die liute .
0,483 gâheten vore der briute .
0,484 alsô solten wir alle gelîche .
0,485 gâhen in daz selbe himelrîche .
0,486 dar möhte der rîche .
0,487 komen im selben sæliclîchen .
0,488 wolte er die gewinne .
0,489 teilen durch die minne .
0,490 den vrostigen solte er bewæten .
0,491 den hungerigen nerigen .
0,492 er solte den siechen .
0,493 mit sînem guote suochen .
0,494 wîsen den blinden .
0,495 unde lêren den tumben .
0,496 vasten die zîte .
0,497 die man im gebiete .
0,498 die vîre begân .
0,499 die dâr zuo schulen gestân .
0,500 sînen zehenden williclîchen geben .
0,501 er selbe kristenlîchen leben .
0,501a sînen ebenmenschen minnen
0,502 der werlte guotes gunnen .
0,503 decheinen meineit sol er sweren .
0,504 daz unreht sol er weren .
0,505 diu goteshûs sol er zieren .
0,506 den êwarten êren .
0,507 der uns diu goteswort sol lêren .
0,508 dâ mite mûgen die rîchen . alle .
0,509 komen in die êwigen zelle .
0,510 wande hier teilte ein hûsherre .
0,511 sînen rîchtuom vile verre .
0,512 under sîne knehte .
0,513 die dienen im mit rehte .
0,514 des schatzes sint vûnf pfunt .
0,515 der ist gote wole kunt .
0,516 wande er uns selbe gegeben hât .
0,517 dâ unser dinc an stât .

0,518 daz êrste pfunt daz wir gehoeren .
0,519 daz schulen wir iemer ze gote kêren .
0,520 wan er ist milte unde guot .
0,521 unde uns ie genâde dâ mite tuot
0,522 daz ist daz ander pfunt . daz wir daz lieht hân .
0,523 daz wir die rehten wege dâ mite schulen gân .
0,524 wande er vile rehte wege gât .
0,525 der uns daz lieht verlihen hât .
0,526 mit deme schulen wir uns begân .
0,527 daz wir vile rehte gevaren .
0,528 daz ist daz dritte pfunt . daz wir stinken .
0,529 des schulen wir uns wole bedenken .
0,530 ez ist umbe die gebe sô getân .
0,531 diu sol gewarheit hân .
0,532 mit aller slahte reinen .
0,533 sô mac si wole guot sîn .
0,534 gân wir vûre einen vûlen hunt .
0,535 wir verwinden die nase joch den munt .
0,536 alsô schulen wir uns alle .
0,537 winden von der helle .
0,538 diu stinket wirs danne der hunt .
0,539 dâ vore verwinden wir den munt .
0,540 diu stenke von der helle .
0,541 diu quelet uns alle .
0,542 der si beslozen hât .
0,543 der getuo unser rât .
0,544 der wâre gotes sun .
0,545 mit sîn selbes zesewen .
0,546 daz ist daz vierde pfunt . daz wir den smac hân .
0,547 wole mûgen wir uns entstân .
0,548 daz man in den lîchnamen tuot .
0,549 weder ez ist ûbel oder guot .
0,550 wande der munt wole entstât
0,551 welich sûeze ez hât .
0,552 daz sint vier pfunt .
0,553 daz ist ein schoene gesunt
0,554 daz vûnfte pfunt ist verlâzen .
0,555 an den henden unde an den vuozen .
0,556 daz wir die wole mûgen rûeren
0,557 swar wir wellen kêren .
0,558 mit den vûnf sinnen
0,559 schulen wir gewinnen .
0,560 den êwigen lîp
0,561 ez sî man oder wîp .
0,562 daz sage ich iu rehte wie ez stât
0,563 swer des guotes niene hât .
0,564 der bete mit sînem râte
0,565 unde mit sînem muote .

0,566 unde wûrke im drâte
0,567 mit handen genôte .
0,568 unde habe ze gote vile guoten willen
0,569 unde île den mit werken ervûllen .
0,570 der tiure Paulus .
0,571 der lêret uns sus .
0,572 uns rætet Isaias .
0,573 daz wir keren daz hûs .
0,574 ob got dâr zuo kome .
0,575 daz im dâr inne gezeme .
0,576 wir schulen got vûrhten unde minnen .
0,577 sô mûgen wir sîn hulde gewinnen .
0,578 unde volgen ouch des vile tiuren sinnes
0,579 sanctî Johannis .
0,580 unde tuon sam der edel are .
0,581 der dâ sweimente vare .
0,582 sô in daz alter an gât .
0,583 daz er daz gevidere lât .
0,584 sô ist er alt .
0,585 sô ist er kalt .
0,586 er vellet in einen walt .
0,587 von dem paradîsô er gât .
0,588 dâ sîn trôst gar an stât .
0,589 er gâhet ze einem brunne .
0,590 er badet sich dâr inne .
0,591 im wehset sîn gevidere .
0,592 er vliuget hin widere .
0,593 mit micheler krefte .
0,594 ûf in die lufte .
0,595 êr er iemer kome hin widere .
0,596 im vunket sîn gevidere .
0,597 diu ougen sint im alsô licht .
0,598 des en habete er êr nicht .
0,599 sô habet der are edele .
0,600 ein schoenez gevidere .
0,601 schoener danne ez êr . was .
0,602 der bezeichnenet daz .
0,603 daz diu brût sô wole gebadet wart .
0,604 dô si vuor an die vart .
0,605 daz bezeichnenet uns alle alte unde junge .
0,605a an der wandelunge
0,606 sô der man gevalle .
0,607 niene er hier twelle .
0,608 er schol im einen hân erkoren
0,609 der obenân sî beschoren .
0,610 der vile geistlîchen vare .
0,611 unde gâhe dare .
0,612 unde sage allen den rât .

0,613 den im der getân hât .
0,614 der uns dâ gerne wile geschenden .
0,615 der genâden erwenden .
0,616 der kan im wole gerâten .
0,617 wie er sich dâ vore behüete .
0,618 der bihte der sint drîe .
0,619 einiu ist gezalt zuo dem kupfer unde zuo dem blîwe .
0,620 einiu heizet silberîn .
0,621 daz lât die bezzeren sîn .
0,622 diu dritte ist güldîn .
0,623 daz lât die hêresten sîn .
0,624 daz sage ich iu rehte wie ez stât .
0,625 der die kupferînen bihte dâ begât .
0,626 der ist in dem rîche .
0,627 vile harte werltlîchen .
0,628 unz er daz guot geniuzet .
0,629 unde den lîp vervlîzet .
0,630 daz er durch got niene gît .
0,631 biz er bî dem bettebrete gelît .
0,632 sô sendet er vile harte .
0,633 nâch dem êwarte .
0,634 daz er im gebîte .
0,635 unze er getuo sîne bihte .
0,636 sô der êwart dar kumet .
0,637 unde er sîn gekoese vernimet .
0,638 sô hebet er sîn gekoese .
0,639 sîn kraft diu sî boese .
0,640 er teilet sîn guot .
0,641 durh die michelen nôt .
0,642 ie deme unde deme .
0,643 ob in daz ende geneme .
0,644 sô hât er dannoch den muot .
0,645 alsô vile maniger tuot .
0,646 ob er ez selbe gelebe .
0,647 daz er ir decheinem niene gebe .
0,648 ich wæne daz ist der wille
0,649 der die sêle bevelle .
0,650 sô scheidet sêle unde lîp .
0,651 ez sî man oder wîp .
0,652 swaz er wider gotes hulden hât getân
0,653 er ne mac sich sîn niht ergân .
0,654 diu bihte diu ist kupferîn .
0,655 daz lât die boesesten sîn .
0,656 ich sage iu rehte wie ez stât .
0,657 der die silberînen bihte begât
0,658 der ist in dem rîche .
0,659 vile harte werltlîchen .
0,660 daz er mit den beinen dar gât .

0,661 dâ der êwart stât .
0,662 er quiut “hêrre .
0,663 ich hân gesündet verre .
0,664 wider gotes hulden getân .
0,665 hêrre ir schulet mich bestân .
0,666 setzet mich in buoze .
0,667 ob mich got leben lâze .
0,668 daz ich vore mînem ende .
0,669 gebüeze mîne sünde .
0,670 der êwart ist guot .
0,671 wande er ez williclîchen tuot .”
0,672 er setzet in in buoze .
0,673 über kleine unde grôze .
0,674 mit vasten unde mit den dingen .
0,675 die er danne mac vürbringen .
0,676 er heizet in daz haben unz an sîn ende .
0,677 bûezen wole sîne sünde .
0,678 diu bîhte ist silberîn .
0,679 daz lât die bezzeren sîn .
0,680 daz sage ich iu rehte wie daz stât .
0,681 der die güldînen bîhte dâ begât .
0,682 swie der man gesundet .
0,683 der ez enzît tuot .
0,684 mit waltender hende .
0,685 der mac wole leschen sîne sünde .
0,686 unz er habet sîn guot .
0,687 der sîne bîhte wole tuot .
0,688 mit werken joch mit worten .
0,689 dem gewîhten êwarten .
0,690 und er lîp und guot .
0,691 ze gotes dieneste tuot .
0,692 diu bîhte ist güldîn .
0,693 daz lât die spangen sîn .
0,694 die diu brût an ir hæte .
0,695 alsô schône an ire wæte .
0,696 daz golt vile ziere .
0,697 daz bezeichnenet die bîhte alsô hêre .
0,698 diu wiere dâr inne
0,699 bezeichnenet die wâren minne .
0,700 die daz mennische ze gote hât .
0,701 sô ez an rehten riuwen stât
0,702 vore sînem ende .
0,703 über alle sîne sünde .
0,704 swer die bîhte hât getân .
0,705 der mac vroelîchen gân .
0,706 dâ diu werlt elliu sol vore gote stân .
0,707 der wirdet dâ genant daz gesegenet kint .
0,708 sô si vore gote sælic sint .

0,709 swelicher sô tuot der lernet .
0,710 daz er daz wort garnet .
0,711 dâ der wâre brûtegoum dâ kumet .
0,712 unde sîne gemahelen zuo im nimet .
0,713 dâ nimet er die erwelten .
0,714 in vûrhtent die vertwelten .
0,715 wunderlîche sêre .
0,716 tages habent si niht mêre .
0,717 dâ lât got manige vrouwen .
0,718 sîne wunden schouwen . in
0,719 sînem heizmuote .
0,720 berunnen al mit bluote .
0,721 ze allen vieren enden .
0,722 in vuozen joch in henden .
0,723 einen stich durch sîne sîten . wir
0,724 sehen in allen bluoten .
0,725 den er durch uns erliten hât .
0,726 dâ diu werlt engegenwert stât .
0,727 diu vrouwe ist nie sô hêre .
0,728 si en vûrhte ir dâ vile sêre .
0,729 der hêre ist nie sô rîche
0,730 er ne vûrhte im vreislîchen .
0,731 dâ stât der êwarte
0,732 er vûrhtet im vile harte .
0,733 dâ riuwet die süntære .
0,734 daz si ie wurden ungehoere .
0,735 dâ rihtet got rehte .
0,736 dem hêren joch dem knehte .
0,737 der vrouwen joch der diuwe .
0,738 alsô si habent riuwe
0,739 mannegelîch nâch sînem gewûrhte .
0,740 dâ mûgen wir uns balde vûrhten .
0,741 ein urliuwe dô ergât
0,742 dâ disiu werlt nû lange ane stât .
0,743 daz die übermûetigen rîtent .
0,744 unde mit den armen stritent
0,745 unde die wellent verstôzen .
0,746 unde daz durch nieman lazzent .
0,747 werden wir wole dâ gesunderet .
0,748 daz weiz got .
0,749 dâr got sînen vluoch tuot .
0,750 dâ vellet er den hôchmuot .
0,751 daz sîn wirdet dechein gewaht .
0,752 dâ zergât tac unde naht .
0,753 allez gelîche .
0,754 wan daz gotesrîche .
0,755 dô daz teidinc zergât .
0,756 dechein gebet verre stât .

0,757 den got dâ verteilet .
0,758 unde in der vîant geseilet .
0,759 daz kan nieman erlesen .
0,760 wie der decheiner sol genesen .
0,761 die varent ze der gotes winster .
0,762 in eine michel vinster .
0,763 die müezen iemer durch nôt .
0,764 bûwen den êwigen tôt .
0,765 oi â hoi wie der vert .
0,766 der ze der gotes zeswen wirdet geschert .
0,767 der vert die hêren gotesvart .
0,768 sô er ie sælic wart .
0,769 daz sî man oder wîp .
0,770 der ie gewan den lîp .
0,771 daz er danne muoz sîn .
0,772 iemer in gotes mendîn .
0,773 dâ hoeret sîn zunge .
0,774 die rehten mandunge
0,775 dâ sîn wir êrst heim komen .
0,776 sô wir ez an den buochen hân vernomen .
0,777 daz wîze gewæte
0,778 daz diu brût an ir hæte .
0,779 daz bezeichnenet daz wir êr
0,780 müezen werden wîzer danne der snê .
0,781 êr wir in daz gotesrîche mûgen komen .
0,782 daz hân wir dicke wole vernomen .
0,783 der dâ vellet ûf die hôhen berge .
0,784 daz ist ein michel sorge .
0,785 den der snê dâ niender bevliuget .
0,786 wande uns daz buoch niemer liuget .
0,787 nû hân wir alle erkunnet .
0,788 umbe daz leben unde umbe den tôt .
0,789 nû mûgen wir wole mit êren .
0,790 an die gotes muoter kêren .
0,791 daz diu brût dâ vuor in der vare .
0,792 unde si lûhte über alle die schare .
0,793 als ein liechter tagesterne
0,794 daz si si leitten sô gerne .
0,795 daz bezeichnenet die heilige maget .
0,796 als uns daz buoch hât gesaget .
0,797 daz si von einem edelen künne wart geboren .
0,798 unde ûz allen wîben wart erkoren .
0,799 unde ouch siu liechter schein .
0,800 danne der gotes engel dechein .
0,801 daz si sô wole sunge .
0,802 dô si sie heim brungen .
0,803 daz bezeichnenet daz der gotesman .
0,804 niht gemeiten sol stân .

0,805 der sol ie singen .
0,806 daz lop ze gote bringen .
0,807 die heimwarten liute .
0,808 die dâ warteten der – briute .
0,809 die bezeicheent die vünf werlte alle .
0,810 die dâ wâren in der helle .
0,811 die dannen nie mohten komen .
0,812 êr si got selbe dâ muose nemen .
0,813 der vile rîche hêre .
0,814 ûf dem gebirge verre .
0,815 der sîne knehte verswief .
0,816 in daz apgründe tief .
0,817 unde si dâ habete verloren .
0,818 dô wolte er werden âne zorn
0,819 dâr tet got als ein vogel tuot .
0,820 der ist ime alsô gemuot .
0,821 sô er sîn jungede gebiret .
0,822 unde daz boeslich wirdet .
0,823 hoi wie leide im danne geschihet
0,824 swenne er ez alsô swarzez gesihet .
0,825 selbe tuot er im den tât .
0,826 des kumet er in michel nôt
0,827 sô er danne vile wole entstât .
0,828 daz er vile übel dâ getân . hât .
0,829 selbe læt er sîn bluot .
0,830 daz im alsô wê tuot .
0,831 ez bewillet der vogel guote .
0,832 mit sîn selbes bluote .
0,833 unz er iz anderstunt gebiret .
0,834 daz ez schoener wirdet .
0,835 danne ez êr dô wære .
0,836 dô er ez êr von êrste gebære .
0,837 unde lât ez danne hin widere .
0,838 under sîn gevidere .
0,839 in sîn heiz gebruote .
0,840 daz tuont die sîne güete .
0,841 alsô tet got der rîche . uns
0,842 allen gelîche .
0,843 dô er des ze dem gedâhte .
0,844 daz er uns ze dem liehte brâhte .
0,845 er lêch uns allen den rât .
0,846 des er guot state hât .
0,847 ob wir rehte gevüeren .
0,848 daz wir hêrere wâren .
0,849 danne der engel dechein .
0,850 den ie diu sunne beschein .
0,851 den hiez er beten an den man .
0,852 den er êrste bileden began .

0,853 an den hêrren Adâmen .
0,854 von dem wir alle komen .
0,855 dô kom des vîandes – rât .
0,856 unde geschande sîne hantgetât .
0,857 daz wir dô ane viengen .
0,858 sîn gebot übergiengen .
0,859 dô ne habeten wir sîn êre
0,860 dô ne ruochte er unser mêre .
0,861 sô kêrte er abe sînen muot .
0,862 alsô noch der rîche man tuot .
0,863 der hêrre des armen hât rât .
0,864 er ne ruochet wie ez umbe in stât .
0,865 unde ouch der arme übergât
0,866 des rîchen hêrren rât .
0,867 êr . sich dô got verdâhte .
0,868 unde uns von êrste vûre brâhte .
0,869 zuo der niuwen unser armüete .
0,870 dô erbarmete ez im in noete .
0,871 daz wir alle dulten den tât .
0,872 dô lôste er uns durch sîn nôt .
0,873 er edele unde er vile guote .
0,874 mit sînem vile hêren bluote .
0,875 lôste uns got der guote .
0,876 alle gelîche .
0,877 von diu sol der arme .
0,878 den rîchen noch erbarmen .
0,879 ich sage iu wie er ez an vieng .
0,880 dô er unser êrste genâde gevie .
0,881 dô hiez er im einen sînen trût .
0,882 werben ein brût .
0,883 er hiez in gesprechen eine maget .
0,884 daz was dâ vore gewîssaget .
0,885 diu des wert wære .
0,886 daz si den gotessun gebære .
0,887 ob diu maget tæte .
0,888 des si der engel bæte .
0,889 daz si daz kint gebære .
0,890 daz dâ mite versüenet wæren .
0,891 die engel unde diu liute .
0,892 mit der gotesbriute .
0,893 daz was der angel unde der list .
0,894 daz geboren wart Krist .
0,895 daz er die toufe entvienc .
0,896 unde uns manic guot bilede vore begienc .
0,897 manige diemüetîn .
0,898 daz wir alsam tæten .
0,899 er mohte rîten ein ros .
0,900 daz in trüege berc unde mos .

0,901 einen esel er überschreit
0,902 dô er in Jerusalêm reit .
0,903 in die hêresten stat
0,904 diu under dem himele ie gelac
0,905 dô er rîten zuo began .
0,906 manic wîp unde man .
0,907 sanc dô dem mæren .
0,908 die die hêresten wâren .
0,909 daz was an einem donerstage .
0,910 der nâhest der dô gelac .
0,911 sîne marter er in dô seite .
0,912 als er den willen heite .
0,913 under sînen jungeren dâ wart ein strît .
0,914 er underrichte si sîn sît .
0,915 si redeten albesunder .
0,916 si nâme michel wunder
0,917 die dâ hin ze himele vüeren .
0,918 weliche under den die hêresten wæren .
0,919 got hiez si sitzen .
0,920 er underrichte si des mit wizzene .
0,921 daz wazzer er selbe dar truoc .
0,922 dâ er in die vuoze mit twuoc .
0,923 die vuoze joch die hende .
0,924 er truckenete si mit sînem gewande .
0,925 alle besunder .
0,926 dô nam si michel wunder .
0,927 umbe waz got tæte .
0,928 die starken diemüete .
0,929 got in dô seite .
0,930 umbe waz er ez getân heite .
0,931 got sprach selbe durch sînen munt .
0,932 er tæte in allen kunt .
0,933 “daz ich daz wazzer iu hân getragen .
0,934 unde iu die vuoze hân getwagen .
0,935 unde mich sus nidere hân getân .
0,936 unde vore iu sô dieneute gân .
0,937 des schol ich in dem himelrîche den grôzesten lôn hân .
0,938 unde hân iz iu ze einem bilede vore getân .
0,939 daz ir alsam schulet begân .
0,940 swer dort ie ze genâden wile komen .
0,941 der muoz die smâch an sich nemen .
0,942 er muoz die übermuot lâzen .
0,943 diu wirdet hinhinder gestôzen .
0,944 swer sich selben durch daz reht versmæhet .
0,945 der wirdet in mînes vateres rîche gehoeht .
0,946 ir schulet mîniu wort tragen .
0,947 unde schulet si der heidenschefte sagen .
0,948 die heidenschaft bekêren .

0,949 die kristenheit si lêren .
0,950 wellent ir ez rehte begân .
0,951 ich lâze iuch ze jungeste vore aller mîner kristenheit stân .
0,952 unde lâze iuch wesen ze wâre .
0,953 ire urteilære .
0,954 über diu zwelif künne .
0,955 der Jakobes kinde .”
0,956 sîne jungere er gelêrte .
0,957 wie wole er daz bekêrte .
0,958 ich weiz er mit in gemêrte .
0,959 der martire er dô gerte .
0,960 an daz kriuze er dô gevrouc .
0,961 dâ er den tiuvel ane betrouc .
0,962 der sich in daz paradîsum want .
0,963 dâ er einen boum vant .
0,964 dâr inne ze einem angen .
0,965 gelîch einem slangen .
0,966 dâ zerbrach er den ban .
0,967 an dem allerêrsten manne .
0,968 unde an sînem wîbe .
0,969 er bevalgte ire lîbe .
0,970 ein obez er ir bôt .
0,971 dâr an entvienc si den tôt .
0,972 daz obez si ezzen began .
0,973 si bevalgte ez dem manne .
0,974 dâ zerbrâchen si daz gebot .
0,975 daz in getân hæte got .
0,976 dâ lâzen wir die rede stân .
0,977 daz wart dô allez an dem hêren kriuze widertân .
0,978 dô diu nôt der martire an gienc .
0,979 dâ er uns in sîn genâde gevienc .
0,980 dâr an kôs er den tôt
0,981 diu erde erbidemete .
0,982 in vile manigem ende .
0,983 unz in daz apgründe .
0,984 vinsten wart daz sunne lieht .
0,985 daz ne was wunders niht .
0,986 dâr nâch vuor er eine hervart .
0,987 sô nie decheiniu tiurer wart
0,988 er vuor zuo der helle .
0,989 er brach die quâle alle .
0,990 die türe sich entsluzzen .
0,991 die grindel dannen schuzzen .
0,992 diu helle wart ûf getân .
0,993 man sach manigen man stân .
0,994 manic wîp in noete .
0,995 die erlôste got der guote .
0,996 diu helle wart beroubet .

0,997 der vîant getoubet .
0,998 michel mère
0,999 danne er êr wære .
0,1000 im wart sîn menige benomen .
0,1001 sîn rehter meister was komen .
0,1002 der in von êrste verswief .
0,1003 in daz apgründe tief .
0,1004 nider in die helle .
0,1005 und die sîne alle .
0,1006 von dem kore .
0,1007 die tolen engele .
0,1008 die dâ rieten an got .
0,1009 des wart in . wole gelônnet .
0,1010 si vielen ebene alle .
0,1011 drî tage volle .
0,1012 sô dicke sô der regen tuot .
0,1013 si worhten übel oder guot .
0,1014 si muosen ebene alle .
0,1015 dulten die helle .
0,1016 daz was diu Luzifern vart .
0,1017 sô im ie wê wart .
0,1018 hei â hei wie leide im dô wart .
0,1019 dô got in die helle sprach .
0,1020 ze dem allerêrsten . manne .
0,1021 den er bileden began .
0,1022 bînamen er in dô nante .
0,1023 der tiuvel in wole erkante .
0,1024 er sprach vile schiere .
0,1025 got in der helle wære .
0,1026 dô sprach drâte hêrr Adâm
0,1027 dem sîne schulde habete getân .
0,1028 in dem obeze den wâren tôt .
0,1029 der stuont tiefe in der helle nôt
0,1030 “hêrr mîn lieber hêrr .
0,1031 ich getrûwe dir iemer vile verre .
0,1032 nû hilf mir got der guote .
0,1033 ûz der starken noete .”
0,1034 got hiez in ûz varen .
0,1035 unde suochen Abrahames barn .
0,1036 er lie dâ nieman bestân .
0,1037 des er decheine ruoche wolte hân .
0,1038 er lôste si ebene alle .
0,1039 mit gewalte von der helle .
0,1040 die rehten unde die guoten .
0,1041 die sînen willen ie getâten .
0,1042 die helle beslôz er .
0,1043 die ander dâ liez er .
0,1044 daz was ein schoeniu hervart .

0,1045 dâr diu helle beroubet wart .
0,1046 dâr got die sîne knehte .
0,1047 brâhte zuo ire rehte .
0,1048 ze sîner brût loufte .
0,1049 mit sîner martire er si koufte .
0,1050 er vuorte si ebene alle .
0,1051 hin in die hêren zelle .
0,1052 die hermüeden liute .
0,1053 die kômen mit der briute .
0,1054 daz sint die zwelif salliute .
0,1055 mînes truhtînes trûte .
0,1056 unde ander martirære .
0,1057 edel unde hêre .
0,1058 die durch daz goteswort .
0,1059 wurden gemartiret .
0,1060 die werdent ze alleroberest gesetzet .
0,1061 ire martire wole ergetzet .
0,1062 nû wirdet ouch niemer mêre .
0,1063 dechein brût louft sô hêre .
0,1064 wan disiu niemer mêre zergât
0,1065 unde iemer êwic stât .
0,1066 nû sint geistliche liute .
0,1067 gezalt ze der selben briute .
0,1068 –[...] zuo den geisten .
0,1069 wir solten sîn meister
0,1070 wan wir sîn genant diu gesegenet kint
0,1071 unde ûf uns jene wartende sint .
0,1072 die vore uns dannen sint genomen .
0,1073 unde hin ze den gesegeneten komen .
0,1074 die wartent uns unz an den suontac .
0,1075 sô wole in der dar komen mac
0,1076 swer daz reht begât .
0,1077 daz ze den selben zîten dâ bestât .
0,1078 dem ist si alsô edel unde alsô hêre
0,1079 sô dem allerêrsten ze wâre .
0,1080 nû beschirme uns got alle .
0,1081 vore der siechen helle .
0,1082 unde versperre uns vore der helle munt .
0,1083 unde mache uns an der sêle gesunt .
0,1084 daz er unser vater werde .
0,1085 in dem himel unde in der erde .
0,1086 sît er uns ze sînen kinden hât genomen .
0,1087 daz ouch wir in sîn rîche müezen komen .
0,1088 wan wir von im haben den âtem .
0,1089 daz werde wâr âmên .